




KATILINGBAN

Ang opisyal nga pamantalaan sa Basic Ecclesial Communities (BEC) sa parokya sa Naval

Vol 1, No. 5

website: www.geocities.com/navaldiocese

Disyembre 2004



Most Rev. Filomeno G. Bactol, D.D.

Mensahe

Ang Adbyento ug Ang Pasko

Sulod sa bulan sa Disyembre, pagasaulugon nato ang duha ka “panahon” sa Simbahan: ang una mao ang

panahon sa Adbyento, ang ikaduha mao ang panahon sa Pasko.

Ang Adbyento nagakahulugan ug “pag-abot” sa atong Ginoong Hesukristo. Gisabut kini sa duduha ka pamaagi. Una, ang pag-abot ni Kristo sa kasaulugan sa Pasko sa Pagkatawo; ikaduha, ang pag-abot ni Kristo sa Katapusang Panahon aron sa paghatag sa Paghukom. Niining duruha nga pagsabot sa “pag-abot” sa atong Ginoo, ang Simbahan nagtawag kanatong katawhan karong panahon sa Adbyento sa kinasingkasing nga pagpangandam ug malipayon nga pagpaabot sa atong Ginoo. Ang Adbyento naglangkob ug upat ka Domingo (Nob. 28, Dec. 5, 12 ug 19) nga gitiman-an sa upat ka kandila diha sa Korona sa Adbyento nga anaa sa mga altar sa atong kapilya.

Ang panahon sa Pasko sa Pagkatawo sa atong Ginoo magsugod sa misa sa Tungang Gabii sa Dis. 24. Kini nga panahon mao ang atong malipayon nga kasaulugan sa pag-abot sa atong kaluwasan pinaagi sa pagkatawo sa usa ka bata nga mao ang “Emmanuel” (ang Ginoo nagauban kanato). Ang atong mga parol, suga, dayandayan, karoling, *christmas party* ug uban pa nagpakita lamang sa atong malipayon nga pagdawat Kaniya sa atong kinabuhi.

Apan atong hinumduman nga ang Pasko sa Pagkatawo sa atong Ginoo aduna lama’y bili kung nagmatinud-anon kita sa atong pagsaulug sa Adbyento. Mabungahon ug makahuluganon lamang ang atong Pasko kung nag-andam kita sa tinuoray sa tawag sa Adbyento sa pagbag-o sa atong kinabuhi.

Kami nga mga kaparian manghinaut nga ang diwa sa Adbyento magdala kanato sa tinuoray nga kasaulugan sa Pasko. *Maranatha! Umari ka, ayaw paglangan Ginoo.*

Bishop FILOMENO G. BACTOL, D.D.
ug mga Kaparian sa Naval



Pamalandong sa
EBANGHELYO

Disyembre 5, 2004: Ikaduhang Domingo sa
Adbyento

Basahon: Isaias 11:1-10/ Roma 15:4-9/ Mateo 3:1-12

Tema:

Gibutyag ni San Juan nga sa pag-abot sa Ginghamarian sa Dios, usa ka krisis ang mahitabo. Ug kining maong krisis maharong lamang nato pinaagi sa pagpenitensiya, kanang penitensiya nga maoy bunga sa atong pagkakabig balik ngadto sa Dios.

“Di ba siya man mao si Elias nga mibalik aron pagkabig sa tanang butang pinaagi’g kalayo? Mao kini ang sagad madunggan gikan sa iyang mga tigpaminaw. Pagahikit-an ni San Juan nga ang tanang butang daw mga uhot nga sunugon human sa ani. Sanglit “*tingog*” man siya sa Mesiyas, giisip niya ang iyang kaugalingon nga dili takus nga mag-uuna kang Jesus. Ang iyang pagbunyag usa ka bunyag sa tubig lamang, dili sa espiritu.

Atubangan niining maisog ug tiunay nga propeta mabalisa gayud kita. Kinahanglan ilhon nato nga ang makapataha ug maloloy-ong Dios nagpadayag sa iyang gahum diha sa masipang dalogdog ug sa mabugnawng huyohoy.

Ang mensahe ni San Juan nagtawag sa mga Judio ug sa mga Kristyanos ngadto sa pag-amgo nga, pinaagi sa pagpuyo diha sa gugma sa Dios, kita ubos diay sa Diosnong hukom. Gipahimangnoan kita ni San Juan nga kinahanglang kinasingkasing ug ugdang ang atong pagtagad sa gugma sa Dios alang kanato. Adbyento kining iyang teksto nga nagpugos kanato sa paglantaw sa pagpadayag sa Hari nga sukad karong adlaw hangtud sa katapusan nagalain sa tahop gikan sa trigo.

“Basic Ecclesial Communities: A new way of being Church”

Pamalandong:

1. Unsa sa mga pulong nga giwali ni Juan nga Magbubunyang ang nakapatandog kanimo? Nganong natandog ka man?
2. Unsay kahulugan alang kanimo niining pulong **“Andama ninyo ang dalan alang sa Ginoo, hawani ang iyang agi-anan”?**
3. Isip sakop sa Kristohanong Katilingban unsay imong ikatampo alang sa hiniusang lihok aron mahimong makahuluganon ang pagpangandam sa pag-abot sa Ginoo?

Disyembre 12, 2004: Ikatulong Domingo sa Adbiyento
Basahon: Isaias 35:1-6,10/ Santiago 5:7-10/
Mateo 11:2-11

Tema:

Diha sa bilanggoan nalibog ug subo si San Juan nga misugo sa iyang mga tinun-an sa pagpangutana kang Jesus: “Ikaw ba ang among gipaabot nga Mesiyas, o magpaabot pa ba kami’g lain?”

Kining maong pangutana nga milatas sa katuigan makapakugang gayod kanato sa higayon nga masinati nato ang pagpakahilom sa Dios dinhi niining atong katilingban nga nagbali-wala kang Cristo. Milaum kita nga ang ebanghelyo maghatag kanato’g tubag; apan pangutana hinuon ang iyang gipasupot. Nagpaabot kita nga ang ebanghelyo maghatag kanato’g inandam nga mga kasulbaran, Apan gidapit hinuon kita sa pagpangita’g kasulbaran. Nangandoy kita og talagsaong mga ilhanan; apan ang gingharian nagsunod hinuon sa hinay nga paggitib sama’g liso. Sa makadaghan malisud alang kanato sa pagsagop nga ang Kristyanismo usa ka gawasnong ug mahigugmaong paagi sa pagkinabuhi – usa ka kinabuhi nga

nanginahangla’g pagtuo ug risgo. Sama kang San Juan, kita usab kinahanglang mosulod sa Adbiyento sa atong pagtuo ug ilhon nato diha kang Jesu Cristo ang mapaubsanon ug maloluy-ong Dios nga buot moluwas kanato.

Ang mga ilhanan sa iyang pag-abot ania na dinhi kanato, tago apan buhi. Pinaagi’g pagtuo, daghang mga Kristyano naghatag og kinabuhi sa nagpakatawong Pulong sa Dios dinhi sa atong kapanahonan karon. Gisugdan na nila ang pagbag-o sa kalibutan ug ilang gilumpag ang mga bongbong nga maoy nagbilanggo kanato. Nagkadaghan gayod ang mga Kristyano nga nanginlabot ug nangatungdanan alang sa atong Simbahan. Sa ngalan sa Ebanghelyo nangalagad sila sa mga kabus. Walay puas ang ilang pag-ampo nga misilaob sila sa kalayo sa Diosnong gugma nga gipaambit ni Jesus. Kini sila – ang mga propeta sa Mesiyas – sayod nga ang mapailubong paglaum maoy nagtukmod kanato sa pagpamuhat.

Pamalandong:

1. Unsa nga pulong o tudling diha sa gibasa nga ebanghelyo ang nakapatandog kanimo? Ngano man?
2. Unsay kahulugan alang kanimo niining giingon sa Kasulatan: “Ania ang akong gisugo,.... Ipadala ko siya una kanimo aron andamon niya ang dalan alang kanimo”.
3. Ikaw ba nanginlabot ug nangatungdanan alang sa atong Simbahan isip buhing pagsaksi sa imong pagkabinunyagan? Sa unsang paagi?



KATILINGBAN
Ang pagpapalipit ng mga artikulo sa Basikong Espiritwal nga Komunita (BEC) sa parokya sa Makati

TEAM MINISTRY

Team Moderator: Bishop Filomeno G. Bactol, D.D.

Team Members: Fr. Marvyn A. Maceda
Fr. Benjamin C. Pantas
Fr. Jesus G. Ty
Fr. Kenneth Hendricks
Fr. Dario Bebillo

Editor:

Alfredo Paghubasan

Writers/Researchers:

Salvador Castro Reymund Icaín
Ramises Bongabong Linda Roldan
Doxia Canonoy Necitas Casado
Catalina Machete Gualberto Tonelete

Encoders:

Vinna Sabroso Sonia Pitao
Josephine Romero

Circulation Managers:

Jorge Manco
Danny Jayubo
Jonnel Quilaneta
Alfredo Olaer

Business Managers:

Rizalito V. Curso
Conchita Calvez

Computer Specialist

Oscar O. Borrinaga

Disyembre 19, 2004: Ikaupat nga Domingo sa
Adbiyento
Basahon: Isaias 7:10-14/ Roma 1:1-7/ Mateo 1:18-24

Tema:

Sa dihang gisulat ang mga ebanghelyo, ang paghandom sa kamatayon ug pagkabanhaw ni Cristo maoy nagmugna sa mga pagsaysay mahitungod sa iyang pagkabata. Kining mga paghisgot sa pagkabata ni Jesus, ang Dios naglihok na diha kaniya. Si San Mateo milambigit kang San Jose ngadto sa Pagpahibalo sa Anghel kang Maria. Buot lang niyang hataga'g tubag ang pangutanang: "Kinsa man ang Mesiyas?" Alang kang San Mateo, si Jesus "nga maoy magluwas sa iyang katawhan gikan sa ilang kasal-anan," maoy katapausang manununod sa Israel. Ug buhat ni San Jose ang pagpaila kaniya nga sakop sa harianong kagikan ni David.

Sa sinugdan, sayod siya sa haduol nga pagpakatawo sa Manluluwas. Busa buot ni San Jose nga una kini mahitabo, kinahanglan magpahilayo siya gikan niining misteryo kay abi man gud niya og wala siyay labot. Unya ang Dios mipakgang kaniya. Tinuod aang bata nga gisabak ni Maria "lalang sa Espiritu Santo". Apan si San Jose maoy magpaniguro sa legal nga kahimtang ni Jesus pinaagi sa iyang pagdawat kaniya isip iya gayong anak ug sa ingon maghatag kaniya'g ngalan. Gikinahanglan man gud nga pinaagi kang San Jose ang balay ni David maila diha niining bataa, ang "**Dios nga nakig-uban kanato**" (Is.7:14).

Sayon ra kanato ang pag-ingon nga usa ka malipayong hitabo ang pagkatawo. Unsa may atong masulti mahitungod sa atong pagpaabot alang niining bataa diin si San Jose maoy nangamahan sa mga mata sa katawhan? Ang pangutana dinhi dili man aang mahitungod sa kasaysayan sa usa ka banay nga lahi sa ubang kabanayan, kondili ang mahitungod sa kasaysayan sa "Dios nga nakig-uban kanato," ang kasaysayan sa kaluwasan.

Pamalandong:

1. Unsay imong mahulagway diha sa gibasa nga ebanghelyo?
2. Unsay kinaiya nga imong nakita diha kang San Jose?

3. Unsay imong ikatampo aron mapadayon ang kasaysayan sa kaluwasan alang sa tanang katawhan, sama nga gibuhat ni San Jose ang iyang bahin?

Disyembre 26, 2004: Ang Santos nga Banay ni Jesus,
Maria ug Jose
Basahon: Sirac 3:3-7,14-17/ Col.3:12-21/
Mateo 2:13-15, 19-23

Tema:

"Bisag unsay inyong buhaton o isulti, himoa kini sa ngalan sa Ginoong Jesus" (Col.3:17). Apan tanan natong mga kalihukan kinahanglan atong tan-awon nga nahidugtong uban sa buhat sa Dios. Sa atong pagsaulog niining Pasko sa Pagkatawo sa atong Ginoo, makapamalandong kita sa presensiya sa Dios bisan pa diha sa labing kalibutanong mga dapit. Niining iyang presensiya, makakaplag gayud og paglaum ang mga ginikanan, mga kabataan, mga gagmayng katilingban, mga nag-inusara, mga batan-on ug mga tigulang.

Ang mga pagbasa karong Domingoha nga kinutlo gikan sa basahon ni Sirac ug sa Sulat ni San Pablo ngadto sa Simbahan sa Colosas, naghulagway sa tin-aw kaayong malipayong panimalay sa ilang kapanahonan. Bisag diha sa pag-amoma sa mga tigulang nga ginikanan o diha ba hinuon sa mahigugmaong pagpakiglambigit tali sa bana'g asawa, malungtarong nag-awhag ang maong mga mithi. Apan kining mga mithi nanginahanglan og kanunayng bag-o nga paghubad diha sa atong adlaw-adlawng pagkinabuhi. Sa unsa man diayng paagiha matubo ang atong relasyon kon atong gihimo ang tanan sa ngalan ni Cristo Jesus?

Matag tuig ang mga pagbasa sa ebanghelyo nagsaysay kanato sa nagkalainlaing mga yugto sa kinabuhi ni Jesus sa bata pa siya. Ang iyang malipayong panimalay, ang Balaang Banay, simple ra kaayo. Sa ilang pagkahilambigit sa usag-usa sulod sa ilang banay, si Jose, Maria ug Jesus naghimo niining tanan sa ngalan gayod sa Dios. Sa atong kaugalingong kasaysayan karon, kinahanglang ato usab nga himuon ang tanan sa ngalan Niya nga miabot ug nakig-uban kanato.

(sumpay sa pahina 4)

Paggama ug Herbal Medicine Gitudlo

Gitudlo atol sa gibuhang seminar nga gipasiugdahan sa Parish Formation Team ang ilang nakat-unan nga mga pamaagi unsaon paghimo ug herbal medicine. Kini ilang gipahigayon didto sa Barangay Caraycaray niadtong Nobyembre 12, 2004, diin gitambongan usab kini sa mga miembro sa BEC nga nagagikan sa Haguikhican, Mokabocal ug Baras. Gibuhang usab ang susamang seminar didto sa Barangay Atipolo niadtong Nobyembre 13 diin ang mga nagtambong mao ang mga miembro sa BEC nga nagagikan sa Sabang, Agpangi, Magtaran-an, Kawayanan ug Calumpang.

BEC Christmas Party

Pagabuhaton ang hiniusang Christmas Party sa tanang BEC dinhi sa parokya karong umaabot nga Disyembre 17, 2004 diha sa CSN Sports Complex. Kini pagasugdan pinaagi sa usa ka Santos nga Misa sa alas 5:00 sa hapon. Adunay parlor games, presentation sa nagkalain-laing BEC nga masaksihan panahon sa maong panagtigom.

Ang tumong sa maong kalihukan mao nga magkahimamat ug magkausa diha sa maong okasyon pinaagi sa pag-inambitay sa mga talento ug ang pag-ila sa Dios nga siya ang tinubdan sa tanan nga anaa sa tawo.

Congratulations:

BEC First Anniversary Caraycaray -Zone 2

November 30, 2004

From: PARISH FORMATION TEAM

(gikan sa pahina 3)

Pamalandong:

1. Unsa kahimtang o hitabo diha sa gibasa nga ebanghelyo ang labing nakapatandog Kanimo? Unsay imong gibati sa maong kahimtang?
2. Sa imong pagka-amahan/pagka-inahan o pagka-anak andam ka ba sa pagsakrispisyong alang sa ikaayo sa imong pamilya? Ipaambit imong eksperiensiyang bahin niini.
3. Nakaamgo ka ba nga bisan sa labing tawhanon mong kasinatian anaa ang Dios?

Dressmaking ug Silk Screen Printing

Usa ka Seminar-Workshop sa Dressmaking ug Silk Screen Printing ang gibuhang niadtong Nobyembre 22-26, 2004 didto sa Apostolic Center sa parokya sa Naval. Kini gitambongan sa 12 ka partisipante sa dressmaking ug 6 ka partisipante sa silk screen process.

Ang mga trainers sa dressmaking nagagikan sa Cabucgayan National School of Arts and Trades (CNSAT). Kini mao sila Mrs. Basilia Dadizon ug Mrs. Alda Mesagal. Samtang ang nagtudlo sa Silkscreen Process mao si Mr. Roberto Comedero.

Gipatigayon usab sa usa ka representante sa TESDA ang eksaminasyon ngadto sa mga malampusong nagtambong sa maong training-workshop.

Adlaw'ng natawhan sa obispo gisaulog

Hiniusang nag-mañanita ang mga miembro ug opisyal sa nagkalain-laing BEC sa mahal nga Obispo Filomeno G. Bactol, D.D. niadtong kaadlawon sa Nobyembre 29, 2004. Kini atol sa iyang pagsaulog sa ika-65 ka tuig nga natawhan. Gipahigayon ang usa ka hamubo nga programa ug gisundan kini sa pagsaulog sa usa ka Santos nga Misa uban sa mga kaparian sa Naval.

Natawo niadtong Nobyembre 29, 1939 didto sa Carigara, Leyte. Gi-ordinahan sa pagka pari niadtong Abril 6, 1968 didto sa Sacred Heart Seminary Chapel, Palo, Leyte.

Niadtong Nobyembre 29, 1988 gitudlo isip unang Obispo sa bag-ong natukod nga diocesis sa Naval. Ang pormal nga installation nahitabo niadtong March 8, 1989.

Congratulations:

BEC First Anniversary Brgy. Catmon

November 25, 2004

From:

PARISH FORMATION TEAM

PANANAGUTAN

WALANG SINUMAN ANG NABUBUHAY
PARA SA SARILI LAMANG
WALANG SINUMAN ANG NAMAMATAY
PARA SA SARILI LAMANG.

CHORUS:

TAYONG LAHAT AY MAY PANANAGUTAN
SA ISAT-ISA.
TAYONG LAHAT AY TINIPOM NG
DIOS NA KAPILING NIYA.

SA ATING PAGMAMAHALAN
AT PAGLILINGKOD SA KANINO MAN.
TAYO AY NAGDADALA NG BALITA
NG KALIGTASAN..
(REPEAT CHORUS)

SABAY-SABAY NGANG MAG-AAWITAN
ANG MGA BANSA.
TAYO'Y TINURING NG PANGINOON
BILANG MGA ANAK.

SA IMONG PAGTAWAG

SA IMONG PAGTAWAG
SA KABUS KONG NGALAN
ANG MALUMO MONG TINGOG
MILANOG NIINING DUGHAN
SA AKONG PAGPALANDONG
DI GAYOD MAHIMONG BALIBARAN
ANG IMONG GIPANGAYO
ANG GUGMA KONG TIUNAY.

BUSA ANIA AKO
NAGLUHOD SA IMONG ATUBANGAN
KAY ANG IMONG PAGBUOT
MAO DAY MATUMAN.

DAWATA NA KI'NG KALAG,
IMO NA ANG KASINGKASING
ANG TANAN AKONG IHALAD
KANIMO O DIOS.



I LOVE YOU LORD

I LOVE YOU LORD,
AND I LIFT MY VOICE
TO WORSHIP YOU
OH MY SOUL REJOICE
TAKE JOY MY KING
IN WHAT YOU HEAR
LET IT BE A SWEET,
SWEET SOUND IN YOUR EAR...

COME HOLY SPIRIT

COME HOLY SPIRIT I NEED YOU
COME HOLY SPIRIT I PRAY
COME WITH YOUR STRENGTH
AND YOUR POWER
COME WITH YOUR OWN SPECIAL WAY

KUNSA'D ISPIRITU SANTO
KUNSA'D NAG-AMPO AKO
KUNSA'D LANGITNONG KALAYO
INITA KINING DUGHAN KO.

HIYAS

HIYAS IKAW TUBURAN KA
SA KAHAYAG UG PAGLAUM
ANG IMOHANG PAGSIDLAK
IPALAYO SA DAG-UM
IWAGI KARON SA PAGPAAMBIT MO
ANG NANGITNGITAN SA
PAGPAKAHILUM
LAMDAGI ANG TANAN NGA IMONG
SILINGAN KAY SILA
ANG TULUBAGON MO.

CHORUS:

HIYAS IKAW KABILILHON
KUNG MAKIGSALO KA
HIYAS IKAW KADALAYGON
KUNG MAKIG-AMBIT KA.

HIYAS IKAW BULAWANON
NGA BINUHAT SA GINOO
BISAN KABUS ADUNAHAN
ANG PAGHIGUGMA MO
KUNG MANGGIHATAGON
ANG IMONG PALAD
MAY BAHANDI KA NGA
KANUNAY'NG IHATAG

KAY ANG KAWAD-ON MO
MAOY KAWAD-ON KO
KAY KITA SA KAANGAYAN ANAK.
(REPEAT CHORUS)



Gitik-gitik sa Kinabuhi

*Pwerting sukua sa usa ka batan-on
kay giilian man ang iyang baligya
nga utanon didto sa merkado.*

Tendero: Unsa man ning lagasa nga
magpataka man lang ug
pangihi!

Lagas: Oy Dong, nganli lang ko ug
Buang, ayaw lang nianang
lagas!

Tendero: Ah...Buang man diay kang
lagasa ka!

-oOo-

Anak: Nay! May makililimos sa
gawas, mangayo kuno ug mga
daan nga mga senina!

Nanay: Ingna siya nga pulos bag-o
ang atong mga bado.

HEALTH ADVISORY

Ang kape makapanerbyos
samtang ang gatas makapakusog sa
lawas. Mao nga ayaw pag-inom ug
kape nga may gatas kay kini
makapakusog sa imong nerbyos.

-oOo-

Kriminal: Tsip! Puwede bang mouli
una ako kay magkuha lang
ko ng payong. Hulata lang
ko dinhi.

Pulis: Unsa ko buang! Nakasabot ko
nga gusto lang ka nga
moiskapo. Mas maayo pa,
ako nalang ang magkuha ug
payong. Huwata lang ko
dinhi!



ANG PAGBAG-O

Usa ka lalaki naghatag ug testimonya didto sa simbahan sa istorya sa pagbag-o sa iyang kinabuhi: gikan sa kinabuhing parahubog, sugarol, ug himamaye ngadto sa kinabuhing buotan ug duol sa Dios. Kalit lamang usa ka lalaki nga bagis ug nawong misiyagit: *“Buwa ka na! Nagdamgo ka lang uy!”*

Human sa iyang pagsiyagit, naaninaw niya nga adunay nagsige ug bira sa iyang sinina. Paglingi niya, nakita niya ang usa ka bata nga babaye. Ang bata nagkanayon: *“Sir, ako ang anak nianang tawo nga naghatag ug testimonya diha sa altar. Sultihan tika Sir nga kaniadto si Tatay pirme gyud hubog ug iyang kastiguon pirme and akong Nanay. Wala mi halos makaon kay maubos tungod sa sugal ug walay kalinaw among balay. Apan tan-awa bag-o ang akong sinina ug sapatos karon tungod kay gipalitan ako ni Tatay. Unya miingon ka nga buwaon ang ako’ng Tatay?”*

Unya mitudlo ang bata ngadto sa usa ka babaye nga naglingkod ug miingon: *“Nakita nimo na’ng babayhana? Ako na siya’ng Nanay. Sukad sa pagbag-o ni Tatay wala na gayud na maghinilak si Nanay kay malipayon na siya pirme. Unya moingon ka nga buwaon si Tatay?”*

Ug nagpadayon ang bata: *“Kung tinuod man ang imong gisulti, Sir, nga nagdamgo lamang si Tatay, palihug ayaw siya ug pukawa kay dili ko gusto nga magmata pa siya!”*

PAGTULUN-AN: Tinuoray ug kinasingkasing ba ang imong pagbag-o?

GUGMA UG KALINAW

Sulod sa pila ka tuig, wala siya makigsandurot kang bisan kinsa tungod sa pagmahay. Wala na siya mosimba sa iglesia nga kanhi iyang gimahal. Karon nagdaot na siya ug gitagalan na ang iyang kinabuhi, ug nagpunay na siya’g hilak. Nabalaka ang pipila ka mga tawo nga nagpa-kabana labot kaniya. Mahinumdoman nila siya ingon nga mainitong Kristohanon hangtod nahitabo ang makasusubo nga butang.

Usa ka sapian nga miyembro sa simbahan ang milimbong kaniya sa usa ka transaksyon sa negosyo ug unya ug unya gipakaulawan siya. Sa sinugdanan, gibuhat niya ang angay buhaton – nakig-istorya siya sa maong tawo. Dihang napakyas siya, miduol siya sa usa ka anciano sa simbahan ug nagpauban kanila aron atubangon ang maong tawo, apan wala kanilay buot manginlabot. Tungod sa kahiubos, mibiya siya sa simbahan ug nagmasulubon sa iyang pag-inusara.

Sa walay pagdapig sa sad-an nga negosyante o sa talawan nga mga anciano, makaingon ako nga ang kakulang sa kalinaw nga gibati niadtong tawhana nagsumikad sa kaugalingon niyang pagsupak sa Dios. Bisan tuod ug gipasipad-an siya, iya untang gituman ang sugo nga nag-ingon, *“Higugmaa ang imong kaaway”* ug *“pag-ampo kamo alang sa mga tawo nga nagpasipala kaninyo”* (Mat.5:44).

Ang *gugma, pagsugot, ug kalinaw* maoy tulo ka butang nga dili gayod mabulag. Kon gihigugma ta si Jesus sa gugma nga takos kaniya, sundon ta Siya, bisag unsa pay mahitabo. Kon buhaton ta kini, masinati ta ang kalinaw nga ikahatag lamang sa Espiritu sa Dios.

Source: *“Atong Kalan-on sa Adlaw-Adlaw”*

BEC Bulletin

Launching of Vocation Awareness Month
December 4, 2004

Parish BEC Christmas Party
December 17, 2004
Venue: CSN Sports Complex

BEC Anniversaries

Sitio Mangga, Calumpang - December 7, 2004
San Pablo - December 8, 2004
Sabang - Sto. Niño - December 9, 2004
Caraycaray - Zone 3 - December 22, 2004